

ԵՐԵՒԱՅԻ ԾՆՈՒՆԴՆ ՈՒ ԴՐԱՆ ՅԱԶՈՐԴՈՂ ԾԻՍԱԿԱՆ ՍՈՎՈՐՈՅԹՆԵՐԸ ՀԱՅՈՑ ՄԷՋ

Անահիտ Մխիթարեան

Երեխայի ծնունդը միշտ մեծ ու կարեւոր իրադարձութիւն է եղել Հայ ընտանիքի ու հասարակութեան համար: Այն սերտորէն կապուած է դերդաստանի ու սերունդների շարունակականութեան հետ. «ընտանեաց նորածին անդամոց երեւումն ալ կը պահանջէր զուարթ խնճոյք մը, զոր կը յիշատակէ Յաճախապատումն իսկ՝ ցուցանելով սովորութեանս մեծ հնութիւնը. «բազում ուրախութիւն ցուցանեն, կ'ըսէ, ի ծննդեան, եւ բարեկամօք եւ մերձաւորօք տօն կատարի ծննդեան եւ անուանակոչութեան»¹:

Միջնադարեան Հայաստանում գործածական է եղել «տղարերք» եզրոյթը, որը նշանակել է որդեծնութիւն, ծննդաբերութիւն: Հնում կարեւորուել է յատկապէս արու զաւակի ծնունդը, քանի որ նա համարուել է տոհմի շարունակող, օջախի ճրագը վառ պահող, իսկ աղջիկը՝ օտարի ճրագ²: «Չափազանց զօրաւոր էր ընտանիքը մշտնջենաւորելու բնազդը: Ասոր համար անպատճառ մանչ զաւակներ ունենալ կ'ուզէին: Այս պատճառով մանչ զաւակներու ծնունդը ուրախութեամբ կ'ընդունէին եւ աղջիկներու ծնունդը, երբ մանաւանդ յաջորդական էր, տհաճութիւն կը պատճառէր, երբ մանաւանդ մանչ զաւակ չունէին դեռ այր եւ կին»³: Այնքան էր արժեւորուած տղայ երեխայի ծնունդը, որ հարսը դառնում էր բոլորի, յատկապէս տան մեծերի

աչքի լոյսը: Ինչպէս ասում էին ականցիները. «արուն տան դուռը բաց պահողն էր, շարունակութիւնը ընտանիքին, մինչդեռ աղջիկը՝ օտարին յանձնելի ծաղիկ էր»⁴:

Հայ ընտանիքներում երեխայի ծնունդը համարուած էր իսկական պարգեւ, Աստծու տուած ընծայ: Եւ պատահական չէ, որ «ծնունել» բառի փոխարէն երբեմն կիրառուել է «ընծայուել» ձեւը. «Նախիջևանցին սովորաբար չի ասում՝ ես ծնունել եմ այսինչ թուականին կամ այս ինչ տեղում, այլ անպատճառ՝ «ես ընծայած եմ» այս ինչ տարին»⁵:

Երեխայի ծննդեան առիթով շնորհաւորում էին՝ ասելով «աչքդ լոյս լինի».
«...Աչքի լոյսի պէս սիրելու ու փայփայելու բան է եղել նոցա համար զաւակը, իբրեւ նախախնամութեան տուած պարգեւը, իբրեւ ժառանգ, սերունդը շարունակող, իբրեւ տան, ծնողներին աջակից եւ, վերջապէս, իբրեւ օգնական, աշխատող ոյժ»⁶: Աչքալոյսի մաղթանքն ասուել է նաեւ ամուսնութեան ժամանակ, որովհետեւ թէ՛ ծնունդը եւ թէ՛ ամուսնութիւնը կարեւոր իրադարձութիւններ են եղել Հայ իրականութեան մէջ:

Համաձայն քրիստոնէական աշխարհընկալման՝ մարդը ծնունդ է նախ՝ մարմնաւոր ծնողներից, որպիսիք իր ծնողներն

1 Հացունի Վ., Ծաշեր եւ խնճոյք Հիմ Հայաստանի մէջ. Վեցեակ, 1912, էջ 399: Տե՛ս նոյնի՝ Հայունիմ պատմութեան աղբիւր, Վեցեակ, 1936, էջ 82-84:

2 Տե՛ս Ղանաւաճյան Ա., Առածանի, Եր., 1960, էջ 65-67:

3 Պատմութիւն Մալաթիոյ Հայոց. Տեղագրական, պատմական եւ ազգագրական, համադրեց՝ Արշակ Ալպոյաճեան, Պէյրութ, 1916, էջ 1107:

4 Ակն եւ ականցիք. Գախաձեռնեց եւ հաւաքեց Առաքել Քէչեան, աշխ., դասաւորեց եւ խմբագրեց Մ. Պարսամեան, Փարիզ, 1952, էջ 252:

5 Թահազիզ Ե., Նոր Նախիջևանը և նորնախիջևանցիք, - «Ազգագրական հանդէս» (պատմեւեւ՝ ԱՀ), գրքեր VII և VIII, Թիֆլիս, 1901, էջ 96:

6 Նոյն տեղում:

են, ապա՝ երկրորդ անգամ՝ «Հոգեւոր ծնողներից»։ «...Եւ այս ծննդեանս Հայր Աստուած է, եւ մայր՝ եկեղեցին, եւ արգանդ՝ աւազանն, որ ծնանի զմանուկն ջրով եւ Հոգով»⁷։ Մարդը Մկրտութեամբ Հոգեւոր ծնունդ է առնում՝ ծնունդով մկրտութեան աւազանից, որը համեմատում է մօր արգանդի հետ, եւ կատարեալ չէ այն եկեղեցին։ «...Որ ոչ ունի զծնունդս որովայնի իւրոյ»⁸։ Ձեռագրերում մենք տեսնում ենք կնոջ եւ եկեղեցու նմանութիւնը. երկուսն էլ ծնում են. մեկը՝ ֆիզիկապէս, միւսը՝ Հոգեպէս, որով մարդու ծնունդը դառնում է ամբողջական։ «...Եւ զգեցուցանեն կտաւս գեղեցիկս, որպէս Հարսն զգեցուցանեն եւ ածեն գաւտիս, որով մկրտութեան սուրբ աւազանը Հարսի մը կը նմանեցուի, որ սահմանուած է ծնանել որդիս լուսոյ»⁹։

Երեւալի ծննդեանը յաջորդող ծիսակարգի մէջ դասուում են Մկրտութիւնը, Անուանակոչութիւնն ու Քառասունքը։ Կարեւոր են համարուել նաեւ նորածնի պորտ կտրելու, առաջին անգամ եղունգ կտրելու, մազ (մօրամազ) կտրելու, առաջին ատամ հանելու, առաջին քայլերն անելու ժամանակ իրականացուող ծէսերն ու ծիսական գործողութիւնները, որոնք նպաստում էին երեւալի աճին ու զարգացմանը։

Առհասարակ առաջինն ունի ծիսահմայական յատկութիւն, քանի որ այն ինչ որ բանի սկիզբն է, ուստի պէտք է կատարուեն հմայածիսական գործողութիւններ՝

հեռացնելով չարը, անյաջողը եւ առաջ բերելով բարին, յաջողութիւնը. «Առաջինն» ունի իրենից յետոյ եկող նման առարկաների եւ գործողութիւնների հոլթեան ու խնդիրների վրայ ներգործելու հմայական յատկութիւն»¹⁰։

Անուանակոչութիւնը շատ կարեւոր էր Հայ ընտանիքներում։ Երեխաներին երբեմն տրւում էին հնագոյն ժամանակների բնապաշտական անուններ, երբեմն էլ՝ ազգաբնական տուեալ շրջանին բնորոշ տեղանուններից առաջացած անձնանուններ։ Յաճախ էլ նրանց անուանակոչում էին քրիստոնէական սրբերի, նահատակների, գերդաստանի հանգուցեալների անուններով, իսկ երբեմն էլ անուանակոչում էին իրենց երեխաներին՝ ի պատիւ քաջարի հերոսների՝ յուսալով, որ նրանք կը կրեն վերջիններիս լաւագոյն յատկանիշները։ Համաձայն կանոնական աղբիւրների՝ Դ. դարից սկսած եկեղեցին երեւալի անուանակոչութիւնը կապել է նաեւ նրա ծննդեան օրը յիշատակուած սրբերի անունների կամ մկրտութեան հետ. «Գր. Նարեկացին կ'ըսէ, թէ «յաւազանէ կոչեցայ Արթուր» (մեկնելով իւր անունը)»¹¹։ Ծնունդից յետոյ մարդը ստանում է իր անունը, իսկ Մկրտութիւնից յետոյ՝ իր հոգեւոր անունը. «Ծննդեամբն՝ առնումք զանուն մարդոյ, այսպէս եւ Մկրտութեամբն՝ նոր կոչումն ու անուն ստանամք»¹²։

Նորածնի, ինչպէս նաեւ ծննդկանի¹³ համար առանձնայատուկ դեր է ունեցել դայեակը¹⁴։ Միջնադարում ստնտուն ու

7 Բաղդասարյան Է., Հովհաննէս Երզնկացիւն և նրա խրատական արձակը, Եր., 1977, էջ 149։

8 Ձեռ. 457, Մաշտոց Ա., Թ. կամ Ժ. դ., թղ. 29բ։ Տե՛ս Մայր ցուցակ հայերէն ձեռագրաց Մատենադարանին Մխիթարեանց ի վեմետիկ, հտ. Գ, Մաշտոց – Գիրք ձեռնադրութեանց, յօրինեցին Հ. Բարսեղ Սարգսեան եւ Հ. Գրիգոր Սարգսեան, Վեմետիկ-Ա. Ղազար, 1966 (այսուհետ՝ Վեմետիկի ցուցակ, հտ. Գ), էջ 12։

9 Ձեռ. 617, Մաշտոց ԻԷ., Աղի կամ Սաղի գիւղ, 1466 թ., թղ. 193ա։ Տե՛ս Վեմետիկի ցուցակ, հտ. Գ, էջ 258։

10 Օդաբաշեան Ա., Ամանորը հայ ժողովրդական տօնացոյցում, – «Հայ ազգագրութիւն և բանահիւսութիւն» (այսուհետեւ՝ ՀԱԲ), հտ. 9, Եր., 1978, էջ 9։

11 Հացունի Վ., Հայունի պատմութեան սոցիւ, էջ 82։

12 Գրիգոր Տաթևացի, Գիրք քարոզութեան, որ կոչի Ամատան հատոր, Երուսաղէմ, 1998, էջ 149։

13 Ծննդկանը ծննդաբերող կամ մոր ծննդաբերած կիսն է, մորածնի մայրը։ Ազգագրական որոշ շրջաններում ծննդկանին ասում էին ման «տղացկան» կամ «տղոցկան»։

14 Դայեակը կարող էր լինել ման մանկաբարձուհի կամ տատմայր։

սնուցողը կատարել են նաև դայեակի որոշակի գործառույթներ. «Ազնուական տղային ամբողջ սնուցման հոգը ստանձնած էր դայեակը, - սեռը ճշգրիտ հարկին կոչուած նաև դայեակ այր եւ դայեակ կին: ...Բայց դայեակը լայնաբար կը կոչուի նաև սնուցիչ»¹⁵: Վաղ շրջանում դայեակն ունեցել է նաև ստնտուրի գործառույթը, իսկ յետագայում փոխուել են նրա պարտականութիւնները. «... Դայեակը իր պարտականութիւնը կը կատարէ, այսինքն՝ կը լուայ նորածինը, պորտը կը կապէ, կ'աղէ եւ կը փաթաթէ խանձարուրի մէջ: Տղաձգանը¹⁶ կ'երթայ անկողնոյն մէջ՝ քովը առնելով իր նորածինը: Բարձին վրայ կը դրուի մկրատի մը ծայրը միտուած չոր սոխ մը, որ Մեզմէ աղէկները կամ Ալը չյանդգնին դալ ու յափշտակել երախան»¹⁷: Դայակն իր նուիրուած աշխատանքի համար վարձատրուած էր. «Դայեակը տղաձգանի տնէն նուէր կ'ընդունի ուրիշ անգամներ ալ, մէկ մը «պօրտ կտրելուն» եւ մէկ մ'ալ երախան «միւռոնէն հանել»-ուն համար, պօրտ կտրելու ատեն մկրատը պօրտին վրայ դրած կ'ըսէ. «Պօրտ կըյրիմա», ներկաներն ալ կը պատասխանեն. «Վարձքդ կատար»¹⁸:

Երեխայի ծնունդուց յետոյ կատարուած էին կարեւոր ծիսական գործողութիւններ՝ կապուած «պօրտը կտրելու» հետ: Տատմայրը, երեք անգամ խաչակնքելով ու «Հայր մեր»-ն ասելով, կտրում է երեխայի պօրտն ու բամբակէ թելով կապում: Տղայ երեխայի պօրտը հեռու ու ընդարձակ տեղ էին գցում՝ հաւատալով, որ մեծ շրջապատ կ'ունենայ եւ հասարակութեան մէջ յարգուած մարդ կը

դառնայ, իսկ աղջկայ պօրտը թաղում էին տան մի անկիւնում, որպէսզի յետագայում նա համեստ ու ամօթխած տանտիկին լինէր¹⁹: Որոշ վայրերում էլ նորածնի պօրտը կտրելուց յետոյ եկեղեցու տանիքն էին գցում, որպէսզի եկեղեցասէր լինէր²⁰: Երբ տատմայրը լողացնում էր նորածնին, ասում էր. «Էս ջրի պէս ումրդ երկար ըլի, Աստու աջողութիւնը վրէժ ըլի, մատտ ըլիս, լաւ ըլիս, ուրախ ըլիս»²¹: Կամ քաշում էր երեխայի վզից, որպէսզի երկար վիզ ունենար, ասում էր. «Էրկան վզիկ, թա'փ տուր ցաւիկ, չալկէ մսիկ»²²: Լողացնելու ընթացքում մերսում էր երեխայի մարմինը՝ փորձելով զարգացնել մարմնի, դէմքի մկանները, քիմքը՝ առողջ ու գեղեցիկ լինելու նպատակով: Իսկ երեխային ջրից հանելիս վրան աղ էր ցանում (նաև բերանի մէջ) եւ ասում. «Աստուած, դու պահես էս երեխին, չարէն թափես, դեւից աղատես, ամէն փորձանքից դու պահես, պահպանես»²³: Ապա բարուրում էր նորածնին, բարուրի վրայ մի կտոր հաց դնում, դուրս էր հանում տանից, պահում դէպի աւրեւելք՝ ասելով. «Սուրբ ընդհակ, էս երեխի փայլ տաս, երկնքիցը ցօղ ցօղայ, գետնիցը պտուղ ստանայ»²⁴ ողջ բնութեանը մասնակից դարձնելով երեխայի օրհնութեանը: Յետոյ տուն էր մտնում, երեք անգամ խաչակնքելով, դնում ծննդկանի աջ կողմում²⁵: Ընդհանրապէս մանկան բարուրը միշտ դրել են մօր աջ կողմում, քանի որ աջը համարուել է բարի հրեշտակներով պաշտպանուած ու յաջողութեան խորհրդանշի:

15 Հացունի Վ., Դաստիարակութիւնը հին հայոց քով, Վեցետիկ, 1923, էջ 20:

16 Մալաթիայում ծննդկանին ասում էին «տղաձգան»: Տե՛ս Անա Ծափազիզ Ե., Նոր Նախիջևանը և Աորմախիջևանցիք, էջ 96:

17 Պատմութիւն Մալաթիոյ Հայոց, էջ 1124:

18 Նոյն տեղում, էջ 1125:

19 Լալայեան Ե., Վարանդա, - ԱՀ, գիրք Բ., Թիֆլիս, 1897, էջ 146:

20 Ակն եւ ակնցիք, էջ 293:

21 Լալայեան Ե., Բորչալոյի գաւառ. - ԱՀ, գիրք IX, Թիֆլիս, 1902, էջ 252:

22 Նոյնի՝ Զաւաթը, - ԱՀ, գիրք Ա... Ծուշի, 1895, էջ 269:

23 Նոյնի՝ Բորչալոյի գաւառ, էջ 252:

24 Նոյն տեղում:

25 Տե՛ս Լալայեան Ե., Վարանդա, էջ 147: Նոյնի՝ Սիսիան, - ԱՀ, գիրք Գ., Թիֆլիս, 1898, էջ 228:

Պատմաազգագրական գրեթե բոլոր շրջաններում նորածին լողացնելուց անմիջապես յետոյ մարմնի վրայ աղ էին ցանում: Աղը համարում էր առողջարար միջոց, քանի որ ունէր ակտազանոդ յատկութիւն, բացի այդ պաշտպանում էր չարից: Հնում աղով ծիսահմայական գործողութիւններ կատարելու սովորութիւն կար, քանի որ ժողովրդական հաւատալիքներում աղն ունեցել է նաեւ հմայական զօրութիւն. «...եւ յամենայն շարժմակա բժժանաց, հմայից, դիւթաց, յորս կոչեն զդեւան յաղ, յերկաթ, ի ջուր, նարաւտս, յիւղս, ի գարի, ի յուլունս, ի մոմ, եւ ի հեր գլխոյ եւ յամենայն պղծութիւնս, որով պղծենն եւ կորուսանեն զոգիս հնազանդելոցն»²⁶:

Հնագոյն ժամանակներում աղի պաշտամունքը կապուած էր պտղաբերութեան հետ. «Աղը Անահիտ դիցուհուց անբաժանելի է. այդ երկուսը միասնաբար հովանաւորում են մօրն ու մանկանը: Դա արտայայտւում էր նրանով, որ աղը պահւում էր Անահիտ դիցուհուն պատկերող կանացիակերպ կաւէ աղամանների մէջ: Ամենայն հաւանականութեամբ, հին Հայերը աղը համարում են Անահիտի պարգեւը, որով եւ պէտք է բացատրել նորածին մանկան վրայ աղ ցանելու, ինչպէս նաեւ մարդկանց եւ տան անմաքրութիւնն աղով մաքրելու սովորութիւնները»²⁷:

Աղի պաշտամունքը շարունակուել է քրիստոնէութեան շրջանում որպէս մաքրութեան ու առողջութեան խորհրդանիշ. «Օրհնեա՛, Տէ՛ր, ողորմութեամբդ քո զաւս, զի յամենայն ինչ, յոր եւ խառնեսցի սա, եղիցի մեզ ի սրբութիւն քաւութեան եւ ի թողութիւն մեղաց...»²⁸:

Աղը մատուցւում է կենդանու զոհաբերութիւնից առաջ: Այսինքն՝ սրբագործումը կատարւում է օրհնած աղի միջոցով, իսկ երբ քառասուն օրը լրանալուց յետոյ երեխային տանում են եկեղեցի, քահանան, վերցնելով երեխային, մօտենում բեմին՝ որպէս ընծայ մատուցելու Աստծուն:

Երեխայի ծննդեան եօթերորդ օրը լրանալուց յետոյ եկեղեցում մկրտում էին, իսկ քառասուն օրը լրանալուց յետոյ՝ քառասունքից հանում: Քառասունքից յետոյ եւ՝ մայրն է լողանում, եւ՝ երեխային են յատուկ արարողութեամբ լողացնում, որից յետոյ միայն մայրը երեխայի հետ (նրանց հետ կարող է լինել նաեւ դայեակը կամ մանկաբարձը) գնում է եկեղեցի՝ կատարելու Քառասուներորդ օրուայ կարգ, որը Մաշտոց ծիսական ժողովածուներում կոչւում է «Կարգ Քառասնօրէին»: Քառասուներորդ օրուայ կարգը կատարւում է ոչ միայն երեխայի, այլեւ մօր՝ ծննդկանի համար, որոնք եկեղեցի են գնում՝ ընծայման. «Իսկ յետ իս աւուր՝ գան ի դուռն եկեղեցւոյն. եւ մայրն խոստովանի քահանային եւ իս ծուր կրկնէ եւ առնու զտղայն ի գիրկն»: Եւ քահանան այս աղօթքն ընթերցում է նախ ծննդկանի համար. «Աստուած մեր, որ եկիր ի փրկութիւն ազգի մարդկան, նայեա՛ ի վերայ աղախնոյս քո. եւ տու՛ր սմա՛՝ ապաւինիլ ի Սուրբ կաթողիկէ եւ առաքելական եկեղեցի քո. մտանել ի տաճար Սուրբ քո, եւ հաղորդիլ փրկական մարմնոյ եւ աբեան քո: Ի բա՛ց լուա զաղտ մարմնոյ եւ

26 Յովհան Մանդակունի, *Դատք* (Իջ. «Թուղթ վասն հմայից դիւթականաց եւ անարեւն յութողաց»): Տե՛ս Մատենագիրք Հայոց, հտ. Ա. Ե. դար, Ամբիլիաս-Լիբանան, 2003, էջ 1264:

27 Բդոյեան Վ., *Հայ ազգագրություն. համառոտ ուրուագիծ*, Եր., 1974, էջ 199:

28 «Օրհնութիւն աղի», *Մաշտոց. արարողութիւնք պաշտամանց եկեղեցւոյ Հայաստանեայց՝ ըստ կարգաւորութեան սրբոց հարցն մերոց*, բաղդատութեամբ բազմաթիւ եւ հնագիւր օրինակաց իբր յիսնից մաւե հնագոյն երկաթագիր ձեռագրի, Վենետիկ, 1831 (այսուհետեւ՝ *Մաշտոց*, Վենետիկ, 1831), էջ 687:

զբիծ հոգւոյ սորա ի լրումն կատարման քառասորեայ աւուրցս...»²⁹:

Քառասունքի ընթացքում մայրը մաքրւում է արիւնահոսութեամբ, հետեւաբար այդ օրերին արգելւում է նրա մուտքը եկեղեցի: Ըստ Հին կտակարանի՝ մայրը երեսայի ծնունդից սկսած քառասուն օր անմաքուր բաների չպիտի ձեռք տայ եւ որեւէ սրբարան չպէտք է մտնի, մինչեւ աւարտուեն նրա մաքրուելու օրերը (Ղեւտ., ԺԲ. 4): Տանն առանձնացնում էին ծննդկանի համար նախատեսուած սպասքի պարագաները եւ թոյլ չէին տալիս, որ նա իր ձեռքով որեւէ բան վերցնի կամ պատրաստի³⁰, քանի որ նա համարւում է անսուրբ եւ ոչ մաքուր, ուստի դերամատչելի էր չարին:

Աւարտելով ծննդկանին ուղղուած աղօթքը՝ քահանան պահպանիչ մի աղօթք էլ հնչեցնում է նորածնի համար. «Տէր Աստուած, որ նորոգութիւնդ ես հնացելոց եւ կեանք՝ մահկանացու աղգի մարդկան, դո՛ւ ես զօրութիւն եւ օգնութիւն ապաւինելոցս ի քեզ: Հաստատուն լիցի շնորհք ողորմութեան քո ի վերայ տղայիս, որ եկեալ կայ քառասորեայ ի ձեռնադրութեան քրիստոնէութեանն, զի եղիցի հզօր եւ աներկիւղ ի թշնամւոյն ներգործութենէ, պահպանութեամբ աջոյդ քո սրբոյ, զի դու ես մերձ յամենեսին եւ բարերար ամենեցուն...»³¹:

Այս արարողութիւնը կատարւում է եկեղեցու դռան առջեւ, որից յետոյ միայն մտնում են եկեղեցի, մայրը քառասուն անգամ ծունր է իջնում սուրբ սեղանի առաջ, իսկ քահանան աղօթում է՝ յիշատակելով քառասորեայ մանուկ Յիսուսին տաճար տանելն ու Աստծուն ընծայելը. «Տէր Աստուած մեր, որ յաւուրս քառասուն ըստ օ-

րինացն ի տաճարն եկիր յընծայումն հանդերձ Մարեմաւ մարք քո եւ ի գիրկս արդարոյն Սիմէոնի գգուեցար»³²: Ապա քահանան, վերցնելով երեսային, մօտենում է խորանին. «Յետ այսորիկ առնու քահանայն զտղայն եւ հանէ ի բեմն եւ երիցս երկրպագեցուցանէ սուրբ սեղանոյն՝ ասելով. Այս անունն անորնայ երեսայս՝ ծառայ Յիսուսի Քրիստոսի, եկեալ քառասորեայ ի տաճարս յայս յերկրպագութիւն սուրբ սեղանոյս, երկիր պագանէ յանուն Հօր եւ Որդւոյ եւ Հոգւոյն Սրբոյ. ամէն»³³:

Իւրաքանչիւր անցումային ծէսից յետոյ (ծնունդ, ամուսնութիւն, մահ) կատարւում են քառասունքին առնչուող ծիսական արարողութիւններ: Քառասուն օրը մի ժամանակահատուած է, որի ընթացքում թէ՛ նորածինը, թէ՛ նորապսակը եւ թէ՛ հանգուցեալը մտնում են մի նոր աշխարհ, նոր միջավայր, ուստի այդ անցումը պէտք է լինի բարեյաջող, անվտանգ ու ապահով:

«Հայոց ծիսակարգում քառասունքը կիրառւում է որպէս չար ուժերի հնարաւոր ազդեցութեան շրջան: Այս առումով շատ յատկանշական է երեսայի ծննդի հետ կապուած քառասունքի սովորոյթը, երբ ետծննդեան առաջին քառասուն օրը համարւում էր երեսայի եւ ծննդկանի վրայ չար ուժերի հնարաւոր ազդեցութեան շրջան»³⁴:

Քառասունքը ծննդկանին եւ նորածնին չար ուժերից պաշտպանելու յետծննդեան քառասորեայ արգելքների համալիր է. այդ ընթացքում նորածնին ու ծննդկանին մեկուսացնում էին՝ վերջինիս առողջական վիճակը վերականգնելու, նրանց նկատմամբ յատուկ խնամք տածելու նպատակով: Չնայած նորածնի քառասունքի

29 Գիրք Մեծ Մաշտոց կոչեցեալ, յորում հաւաքեալ աւանդիմ ըստ մեծի մասիմ Կարգք և Կանոնք արարողութեան Հայաստանեայց Սուրբ Եկեղեցւոյ, Պոլիս, 1807 (այսուհետեւ՝ Մաշտոց, Պոլիս, 1807), էջ 19բ:

30 Լալայեան Ե., Սիսիան, էջ 229:

31 Մաշտոց, Կ. Պոլիս, 1807, էջ 19բ:

32 Մաշտոց, Վեներտիկ, 1831, էջ 41:

33 Նոյմ տեղում:

34 Թադևոսեան Ա.. Դարբինը հայոց ծիսակարգում (պատմաագագրական ուսումնասիրութիւն), – ՀԱՐ, հտ. 23, Եր., 2007, էջ 121:

ծէսերն ու ծիսական սովորոյթները շատ վաղ արմատներ ունեն, սակայն երբեմն միախառնուում են նախաքրիստոնէականի ու քրիստոնէականի սահմանները: Քառասունքի մէջ գտնուելու շրջանը թէ՛ ծննդկանի եւ թէ՛ նորածնի համար շատ կարեւոր էր, ուստի պահուում էր յետծննդեան քառասնօրեայ արգելքների շրջան, օրինակ՝ մայրն ու երեխան չպէտք է լինէին արեւի տակ, հետեւաբար երեխային ցերեկը դուրս չէին հանում, իսկ գիշերները հանելիս կրծքին մի կտոր հաց էին դնում: Նրանց չէին թողնում մուրթ սնեակուում, ճրագը միշտ վառ էին պահում: Աշխատում էին երբեք միայնակ չթողնել, իսկ եթէ ստիպուած էին լինում, ապա մի աւել էին դնում նրանց մօտ³⁵: Թէ՛ մօր եւ թէ՛ երեխայի բարձի տակ դնում էին Աւետարան, Նարեկ, հմայիլ, հաց, սխտոր, մկրատ, դանակ, դաշոյն³⁶, որպէսզի չարքերը չմօտենան եւ չվնասեն նրանց: Ծննդկանը քառասունքի ընթացքում չպէտք է լողանար, տանից դուրս գար, կենցաղային ծանր աշխատանքներ կատարէր (խմոր հունցել, կով կթել, լուացք անել եւ այլն), չպէտք է այցելէր քառասունքի մէջ գտնուող նորապսակներին, ծննդկաններին, մեռելատուն չպէտք է գնար: Այդ ընթացքում արգելում էր նաեւ կենակցել: Եւ այս ամենն արւում էր չար ուժերից պաշտպանուելու նպատակով:

Պատմական Հայաստանի ազգագրական շրջաններում կատարուող ծիսահմայական պաշտպանիչ արարողութիւնները հիմնականում նոյնաբնոյթ էին: Դրանց նպատակն էր ոչ միայն պահպանել մօրն ու մանկանը չար ուժերի ազդեցութիւններից, այլեւ նպաստել ծննդկանի առողջութեան վերականգնմանը, նորածնի առողջ աճին,

ինչպէս նաեւ ապահովել ընտանիքում սերունդների շարունակականութիւնը:

Քառասունքից հանելու ծէսերը, որոնցով աւարտուում էին ծիսահմայական արարողութիւնները, կատարւում էին քառասունքի վերջին օրը (օրինակ՝ արեւին դուրս էին հանում երեխային եւ երեսը պարզում դէպի արեւը, լողացնելիս քառասուն թաս (բաժակ կամ գդալ) ջուր էին լցնում թէ՛ մօր եւ թէ՛ մանկան գլխին (քառասուն անգամ):

Նորածնին պաշտպանելուն, նրա առողջութիւնն ու յաջողութիւնն ապահովելուն էին միտուած բոլոր ծէսերն ու ծիսական սովորոյթները՝ աղաջրում լողացնելը, օրօրոցից հմայիլներ կախելը, բարձի տակ դանակ, մկրատ կամ որեւէ մետաղ դնելը եւ այլն: Երկաթէ չարխափան հմայիլները (մատանի, ապարանջան, վզնոց), որոնք ունէին մոգական ուժ, կոչուած էին ապահովելու նաեւ հարսների յղիութեան եւ ծննդաբերութեան յաջող ընթացքը. «Սակայն որպէսզի պատրաստուող առարկան ունենար բարերար ու չարխափան ուժ ու կարողութիւն, դարբինն այն պէտք է պատրաստէր մուրճի քառասուն հարուածով: Դրանից աւել կամ պակաս հարուածների թիւը գցում էր հմայիլի զօրութիւնը: ... Ծիսական քառասուն հարուածների թիւը նշում է, որ դրանք անհրաժեշտ են արարչազորութեան համար»³⁷:

Նորածնի ծննդեան ու յետծննդեան ծէսերն ու ծիսական սովորոյթները, որոնք ունեն արխայիկ բնոյթ, ինչպէս նաեւ բնապաշտական տարրեր, ժամանակի ընթացքում միշտ կրել են փոփոխութիւններ՝ հիմքում պահպանելով նախնական խորհրդանշական իմաստը:

35 Լալայեան Ե., *Գանձակի գաւառ*, ԱՀ, գիրք Զ., Թիֆլիս, 1900, էջ 278:

36 Ըստ ժողովրդական ընկալման՝ մետաղեայ իրերն ունեն գերբնական և չարխափան յատկութիւններ:

37 Թադևոսեան Ա., *Դարբինը հայոց ծիսակարգում* (պատմաազգագրական ուսումնասիրութիւն), – ՀԱԲ, էջ 118: